

Tiada RCEP jika tidak adil - Tun Mahathir
Astro Awani
15 November 2018
Harits Asyraf Hasnan,

SINGAPURA: Tun Dr Mahathir Mohamad kekal dengan pendirian tegasnya bahawa Malaysia tidak akan bersetuju dengan tawaran perdagangan yang mempunyai kelompokan.

Perdana Menteri berkata, tindakan untuk tidak menandatangani Perkongsian Ekonomi Komprehensif Serantau (RCEP) merupakan langkah bagi mengelakkan sebarang konflik dalam negara berlaku.

"Kadang kala, hubungan antarabangsa ditafsirkan secara berbeza oleh sebahagian kelompok masyarakat.

"Kita tidak boleh menerima sesuatu yang dengarnya munasabah untuk sesebuah negara lain tetapi bukan bagi sebilangan besar rakyat di negara kita.

"Kita ingin mengelakkan sebarang konflik berlaku susulan tindakan kita bersetuju dengan idea pihak luar," katanya ketika ditemui media seiring Sidang Kemuncak ASEAN Ke-33 di sini, hari ini.

Beliau berkata demikian sebagai menjawab soalan wartawan berkenaan laporan *Bernama* bahawa Malaysia tidak akan menandatangani RCEP jika ia tidak dilaksanakan dengan adil.

Dilancarkan pada 2012, RCEP adalah perjanjian ekonomi terbesar dunia, meliputi hampir setengah ekonomi global.

Ia membabitkan 16 negara – 10 negara anggota ASEAN bersama dengan enam negara Asia Pasifik iaitu Australia, China, India, Jepun, Korea Selatan dan New Zealand.

Rundingan berkenaan perjanjian perdagangan bebas (FTA) itu pada mulanya dijadualkan untuk dimuktamadkan pada Sidang Kemuncak ASEAN ke-33, di sini.

2018Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/tiada-rcep-jika-tidak-adil-tun-mahathir-191219>